



CONVENIO DE COOPERACIÓN ENTRE A XUNTA DE GALICIA, A TRAVÉS DA SECRETARÍA XERAL PARA O DEPORTE, O CONCELLO DE SANTIAGO DE COMPOSTELA, A DEPUTACIÓN PROVINCIAL DA CORUÑA E A UNIVERSIDADE DE SANTIAGO DE COMPOSTELA PARA A RENOVACIÓN E O ACONDICIONAMENTO DA PISTA DO ESTADIO DE ATLETISMO SITUADA NO CAMPUS VIDA

Santiago de Compostela, ____ de _____ de 2021

REUNIDOS

Don José Ramón Lete Lasa, Secretario Xeral para o Deporte da Xunta de Galicia, en uso das competencias desconcentradas nas persoas titulares das secretarías xerais dependentes da Presidencia, que figuran recollidas na disposición adicional segunda do Decreto 109/2021, do 15 de xullo, de estrutura orgánica dos órganos superiores e de dirección dependentes da Presidencia da Xunta de Galicia.

Don Xosé Antonio Sánchez Bugallo, Alcalde do Concello de Santiago de Compostela, con CIF P1507900G e domicilio social na Praza do Obradoiro, s/n, 15705, de Santiago de Compostela, actuando no seu nome e representación en virtude dos poderes outorgados polos artigos 124.4 a) da Lei 7/1985, do 2 de abril, Reguladora das Bases do Réxime Local, e 61.1 a) da Lei 5/1997, do 22 de xullo, de Administración Local de Galicia.

Don Valentín González Formoso, na súa condición de Presidente da Excm. Deputación Provincial da Coruña, con CIF P1500000C e domicilio social na Avenida Porto da Coruña, 2, 15003, da Coruña actuando en virtude da competencia que lle atribúe o artigo 34.1 b) da Lei 7/1985, do 2 de abril, Reguladora das Bases do Réxime Local, e 105.1 a) da Lei 5/1997, do 22 de xullo, de Administración Local de Galicia, e en execución do acordo do Pleno da Corporación do ---- de 2021, polo que se concedeu a subvención nominativa que se instrumenta no presente convenio.

Don Antonio López Díaz, Reitor magnífico da Universidade de Santiago de Compostela (en diante, USC), quen actúa en nome e representación desa





institución en virtude do Decreto 57/2018, do 31 de maio, do seu nomeamento (DOG núm. 106, do 5 de xuño de 2018) e polas facultades conferidas pola Lei orgánica 6/2001, do 21 de decembro, de Universidades, modificada pola Lei orgánica 4/2007, do 12 de abril, e polo Decreto 14/2014, de 30 de xaneiro, polo que se aproban os estatutos da USC, con CIF Q1518001A e sede social no Pazo de San Xerome, sito na Praza do Obradoiro de Santiago de Compostela.

Todas as partes interveñen en función dos seus respectivos cargos e recoñécense mutuamente capacidade para formalizar o presente convenio interadministrativo, sobre a base dos principios de colaboración, cooperación, coordinación e información multilateral que deben presidir as relacións entre administracións en materia de deporte.

MANIFESTAN

A Lei orgánica 1/1981, do 6 de abril, do Estatuto de Autonomía de Galicia, no seu artigo 27.22, sinala a competencia exclusiva da Comunidade Autónoma de Galicia en materia de promoción do deporte.

O artigo 6 da Lei 3/2012, do 2 de abril, do deporte de Galicia, establece que para o mellor exercicio das súas competencias, a Administración autonómica poderá subscribir convenios de colaboración coas demais administracións públicas e entidades públicas e privadas vinculadas á actividade deportiva.

O Decreto 109/2021, do 15 de xullo, de estrutura orgánica dos órganos superiores e de dirección dependentes da Presidencia da Xunta de Galicia, atribúe á Secretaría Xeral para o Deporte a elaboración, proposta e execución da política do Goberno galego en materia de deportes e, en particular, a promoción e difusión da actividade física e do deporte, con especial atención á promoción da igualdade entre homes e mulleres, actuando, se é o caso, en colaboración con outras administracións e entidades públicas e privadas.

No marco da lexislación básica contida na Lei 7/1985, de 2 de abril, Reguladora das Bases do Réxime Local, no artigo 80.2 n) da Lei 5/1997, do 22 de xullo, de Administración Local de Galicia, establécese a competencia xenérica dos concellos, entre outras materias, para todo o relacionado coas actividades e instalacións deportivas nos seus respectivos termos municipais, o que inclúe as actuacións dirixidas á promoción e o fomento do deporte por parte do Concello de Santiago de Compostela.





De igual forma, a Deputación Provincial da Coruña, e sobre a base das competencias propias previstas no artigo 109 da citada Lei 5/1997, entre as que figuran a iniciativa para garantir a prestación integral e adecuada dos servizos públicos, xunto co fomento e a administración dos intereses peculiares da provincia, e sendo coñecedora da necesidade de potenciar na medida do posible o deporte galego nos seus distintos niveis, está interesada en colaborar con todas aquelas entidades que promovan a devandita práctica deportiva.

Doutra banda, no artigo 7 da xa citada Lei do deporte de Galicia, atribúese ás deputacións provinciais competencias relacionadas coa plena utilización das instalacións deportivas existentes no termo provincial, procurando a participación das asociacións deportivas do seu ámbito na optimización do seu uso, así como coidar as condicións de hixiene e seguridade.

A USC é unha entidade de dereito público que contempla entre as súas funcións o desenvolvemento de actividades de extensión universitaria, dirixidas a todos os membros da comunidade universitaria e da sociedade en xeral, coas seguintes finalidades:

- Procurar a formación integral dos membros da comunidade universitaria mediante a programación e organización de cursos, conferencias e todo tipo de actividades culturais, recreativas e deportivas que poidan contribuír á mellor realización deste obxectivo.
Promover unha acción deportiva integral, saudable, diversa e para todas as persoas, co máximo respecto polo noso medio ambiente e a nosa cultura.
Estimular a participación nas actividades físico-deportivas de todos os membros da comunidade universitaria e da cidadanía en xeral.
Reforzar o compromiso institucional coa igualdade, de acordo coas accións promovidas dende os plans de igualdade e outras medidas que se puideran acordar.
Proxectar as funcións e os servizos da universidade na contorna social.
Establecer as medidas necesarias que favorezan e fomenten a práctica deportiva por parte dos membros da comunidade universitaria.

Por todo o anterior, e atendendo ao disposto no artigo 157.4 dos Estatutos da USC en canto ao establecemento de convenios por parte da Universidade coas administracións públicas, outras universidades e con entidades públicas ou privadas para manter e potenciar as súas infraestruturas deportivas, as partes comparecentes citadas con anterioridade, na respectiva representación conferida a cada unha delas,





ACORDAN

Asinar o presente convenio administrativo de cooperación de acordo coas seguintes

CLÁUSULAS

PRIMEIRA. Obxecto

É obxecto do presente Convenio establecer as bases de colaboración entre a Xunta de Galicia, a través da Secretaría Xeral para o Deporte, o Concello de Santiago de Compostela, a Deputación Provincial da Coruña e a Universidade de Santiago de Compostela para o financiamento e execución das obras consistentes na **renovación e o acondicionamento das instalacións de atletismo do estadio universitario, das que dispón a USC no Campus Vida** da cidade de Santiago de Compostela, de forma que se poida restablecer e promover o uso intensivo das mesmas.

As obras obxecto das subvencións, que se outorgan polo procedemento de concesión directa instrumentada a través deste convenio, ao abeiro do disposto no artigo 19.4 c) da Lei 9/2007, do 13 de xuño, de subvencións de Galicia, consisten no acondicionamento da pista do dito estadio, segundo o proxecto de execución, redactado polos técnicos da Área de Arquitectura e Urbanismo da USC, Fernando María Tabernero Duque, arquitecto, Néstor Jesús Rodríguez Porto, arquitecto técnico, e José Ángel Carrillo Presedo, enxeñeiro técnico industrial, aprobado pola Oficina de Supervisión de Proxectos da USC o día 10 de maio de 2021, co seguinte orzamento base estimado para a licitación dos traballos:

Concepto	Importe (€)
Acondicionamento da pista	495.761,99
Orzamento base de licitación	495.761,99

As referidas instalacións deportivas sitúanse no inmovible con número de identificación catastral 6374201NH3467C0001G, que figura no Inventario patrimonial da USC como ben de dominio público, segundo consta na documentación que se achega con este convenio pola entidade beneficiaria das axudas.





SEGUNDA. Financiamento

Os investimentos necesarios para a realización das obras de renovación e acondicionamento das instalacións deportivas serán financiados conxuntamente pola Secretaría Xeral para o Deporte da Xunta de Galicia, o Concello de Santiago de Compostela e a Deputación Provincial da Coruña conforme á seguinte estrutura e cadro de anualidades que se indican:

A Xunta de Galicia, con cargo á aplicación orzamentaria 04.40.441A.744.0 dos orzamentos da Secretaría Xeral para o Deporte, achegará as cantidades que se indican, coa seguinte desagregación:

Anualidade	Importe (€)
2021	76.591,27 €
2022	96.925,42 €
Total:	173.516,69 €

Por parte do Concello de Santiago de Compostela, con cargo á aplicación orzamentaria 090 43200 7670000 dos orzamentos municipais achegaranse as cantidades que se indican, coa seguinte desagregación:

Anualidade	Importe (€)
2021	65.649,66 €
2022	83.078,94 €
Total:	148.728,60 €

A Deputación Provincial da Coruña, con cargo á aplicación orzamentaria 0612/3420/781 dos orzamentos provinciais, achegará as cantidades que se indican coa seguinte desagregación:

Anualidade	Importe (€)
2021	76.591,27 €
2022	96.925,43 €
Total:	173.516,70 €





O financiamento da Deputación Provincial da Coruña para o ano 2022 queda condicionado á aprobación do Orzamento para o dito exercicio, no que se conteña o crédito correspondente a esa anualidade.

Todos aqueles gastos relacionados coa preparación do proxecto, así como a dirección técnica e a coordinación da seguridade e saúde da obra, serán asumidos pola USC.

Da mesma forma, a sinatura do convenio comportará o compromiso para a Universidade de obter a preceptiva licenza municipal de obras e sufragar, de ser o caso, as taxas e impostos que da expedición daquelas puideran devindicarse. Igualmente corresponderá á Universidade, baixo idéntico criterio, a obtención doutras autorizacións ou licenzas sectoriais que se precisen para a realización e posta en marcha das obras.

As axudas contempladas neste convenio son compatibles con outras que poida acadar a USC, sempre que a suma de todas elas non supere o investimento total real.

Antes do primeiro pagamento, a USC achegará unha declaración do conxunto de tódalas solicitudes de subvención efectuadas, ou concedidas, para as obras obxecto deste convenio, diante das administracións públicas competentes ou doutros entes públicos.

No momento da xustificación da execución total do proxecto e, en calquera caso, antes do derradeiro pagamento, a USC presentará unha declaración complementaria do conxunto das axudas solicitadas, tanto as aprobadas ou concedidas como das pendentes da resolución, para este proxecto, das distintas administracións públicas competentes ou das súas entidades vinculadas ou dependentes.

No caso de que se produza un exceso de financiamento, resultará de aplicación o disposto no artigo 33.3 da Lei 9/2007, de Subvencións de Galicia, debendo proceder a USC á devolución dos importes que procedan na porcentaxe que lle corresponda a cada unha das administracións.

TERCEIRA. Contratación das obras

As obras serán realizadas polo contratista que sexa seleccionado pola USC, de acordo coas previsións e os procedementos previstos na Lei 9/2017, de 8 de novembro, de contratos do sector público, dando conta ás restantes partes asinantes do presente convenio, así como de calquera modificación do





proxecto, prórrogas de prazos establecidos na adxudicación ou alteracións doutros elementos básicos que configuren as actuacións contratadas.

De acordo co artigo 22.4 da Ordenanza xeral de subvencións e transferencias da Deputación, no comité de expertos para a valoración das ofertas presentadas mediante xuízos de valor, deberá participar un técnico da Deputación.

A execución o e o remate das obras contratadas terá como data límite o **31 de marzo de 2022**.

Tal previsión terá como límite a contía das achegas previstas para cada exercicio de acordo coa cláusula segunda, e sen prexuízo da previsión contida no segundo parágrafo da cláusula quinta, deste convenio.

De acordo co disposto no artigo 4 da Lei 1/2016, do 18 de xaneiro, de transparencia e bo goberno, a USC actuará con suxeición ao disposto nela no que se refire á obriga de subministrar a información, aténdose en caso de incumprimento ao correspondente réxime sancionador previsto na mesma norma.

CUARTA. Obrigas da Universidade

Por parte da USC garántese a utilización polo conxunto da cidadanía das infraestruturas obxecto das obras de renovación, mellora e acondicionamento, con suxeición á normativa reguladora do servizo de uso das instalacións deportivas e ao cadro de tarifas que con carácter anual se establezan polo Consello Social.

As tarifas fixaranse en función dos custos da prestación dos servizos tanto á comunidade universitaria como ao exterior, e sen prexuízo das bonificacións ou exencións previstas legalmente.

A este respecto, a USC comprométese co Concello de Santiago de Compostela a:

1. Asinar un convenio específico de uso.
2. Facilitarlle o uso da pista de atletismo en horario ordinario e exclusivamente para o correspondente adestramento dun máximo de ata 50 deportistas federadas/os designadas/os e acreditadas/os polo Concello de Santiago de Compostela (neste número quedarían incluídas/os tamén as/os adestradoras/es con licenza en





vigor destas/destes deportistas, sempre que estean a desenvolver o seu labor con elas/eles), cunha bonificación do 100% das tarifas previstas, desde o momento da sinatura do convenio que nos ocupa e ata que se inicien as obras ou despois da entrega destas de non mediar aínda un convenio específico de uso.

3. Cederlle o uso das devanditas infraestruturas en horario extraordinario para a celebración de competicións atléticas en interese dos clubs locais e por un máximo de ata 50h. anuais (anuais entendidas por curso deportivo), cunha bonificación do 100% da tarifa prevista (agás os custes extraordinarios de persoal, limpeza e outros que resulten necesarios), unha vez entregadas as obras e de non mediar aínda un convenio específico de uso.

A USC comprométese coa Deputación provincial da Coruña a cederlle o uso das devanditas infraestruturas para a celebración de competicións atléticas organizadas polo organismo provincial e por un máximo de 30 días anuais (anuais entendidas por curso deportivo), cunha bonificación do 100% da tarifa prevista (agás os custes extraordinarios de persoal, limpeza e outros que resulten necesarios), unha vez entregadas as obras.

A USC comprométese a facilitar o uso gratuíto da instalación para todas aquelas competicións deportivas oficiais organizadas ou promovidas pola Secretaría Xeral para o Deporte, previa sinatura dun convenio de colaboración entre ambas institucións que regule os aspectos específicos destas actuacións. Así mesmo, comprométese a favorecer e facilitar a celebración de competicións deportivas de carácter oficial promovidas polas distintas federacións deportivas de Galicia. No caso de conflito ou discrepancia, a Secretaría Xeral para o Deporte, por solicitude dalgunha das partes, poderá actuar como árbitro.

En tanto beneficiaria das axudas a USC, ademais da pertinente acreditación de non incorrer nas prohibicións para obter tal condición recollidas no artigo 10 da Lei 9/2007, do 13 de xuño, de subvencións de Galicia, deberá cumprir as seguintes obrigas previstas nesa mesma norma:

1ª. Execución das obras comprendidas no proxecto técnico que fundamentan a concesión das axudas.

2ª. Xustificar ante as administracións que subvencionan a execución dos traballos o cumprimento das finalidades que sustentan o outorgamento das





axudas, a realización das actuacións que as motivaron e o seu custo real, nos termos establecidos neste convenio.

3ª. Someterse ás actuacións de comprobación que poidan efectuar as devanditas administracións, así como calquera outra comprobación e control financeiro que poidan realizar os órganos de control competentes, tanto nacionais coma comunitarios, e achegar canta información lle sexa requirida no exercicio das actuacións anteriores.

4ª. Comunicar a posible obtención doutras subvencións, axudas, ingresos ou recursos que financien as actuacións subvencionadas, así como a modificación das circunstancias que fundamentasen a concesión das axudas. Esta comunicación efectuarase no momento no que se coñeza e, en todo caso, con anterioridade á xustificación da aplicación dada aos fondos percibidos.

5ª. Acreditar que se encontra ao corrente no cumprimento das súas obrigas tributarias e fronte á Seguridade Social, e que non ten pendente de pagamento ningunha outra débeda coa Administración pública da Comunidade Autónoma de Galicia.

6ª. Dispoñer dos libros contables, rexistros dilixenciados e demais documentos debidamente auditados nos termos esixidos pola lexislación mercantil ou sectorial aplicable ao beneficiario en cada caso, así como cantos estados contables e rexistros específicos resulten esixibles coa finalidade de garantir o adecuado exercicio das facultades de comprobación e control.

7ª. Conservar os documentos xustificativos da aplicación dos fondos recibidos, incluídos os documentos electrónicos, en tanto poidan ser obxecto das actuacións de comprobación e control.

8ª. Destinar os bens sobre os que se realizan as obras ao fin concreto para o que se conceden as axudas por un período non inferior a cinco anos, a tratarse de bens inscribibles nun rexistro público.

9ª. Proceder ao reintegro dos fondos percibidos nos supostos previstos nos artigos 32 e 33 da citada Lei 9/2007, de 13 de xuño, de subvencións de Galicia.

10ª. Diseñar e desenvolver as actuacións comprendidas no obxecto do presente convenio tendo en conta ás necesidades e demandas das persoas con discapacidade e baixo os principios establecidos no Real Decreto Lexislativo 1/2013, do 29 de novembro, polo que se aproba o Texto Refundido





da Lei Xeral de dereitos das persoas con discapacidade e da súa inclusión social.

11ª. A elaboración da documentación necesaria para dar cumprimento á normativa de seguridade e saúde, especialmente ao establecido na Lei 31/1995, do 8 de novembro, de prevención de riscos laborais (BOE núm. 269 do 10.11.1995) e no Real decreto 1627/1997, do 24 de outubro, polo que se establecen disposicións mínimas de seguridade e de saúde nas obras de construción (BOE núm. 256 do 25.10.1997). Prestarase especial atención no caso de que a actuación comprenda algún dos traballos que implican riscos especiais para a seguridade e a saúde dos traballadores, recollidos no anexo II do Real Decreto 1627/1997.

Así mesmo, é responsabilidade da USC a designación do coordinador de seguridade e saúde durante a execución da obra, no caso de que sexa necesario de acordo co establecido no artigo 3.2 do Real Decreto 1627/1997.

12ª. Cumprir cantas outras obrigas se deriven da execución deste convenio.

QUINTA. Obrigas das administracións que financian as obras

A Xunta de Galicia, a través da Secretaría Xeral para o Deporte, o Concello de Santiago de Compostela e a Deputación provincial da Coruña, cooperarán na realización das obras derivadas do presente convenio de colaboración mediante as respectivas achegas, concretadas nos importes descritos na segunda cláusula, que representan as seguintes porcentaxes do orzamento estimado de licitación previsto na cláusula primeira:

Xunta de Galicia: 35%
Concello de Santiago de Compostela: 30%
Deputación provincial da Coruña: 35%

No caso de que o investimento finalmente realizado teña un custo inferior ao previsto de inicio, e sempre que tal circunstancia non supoña unha realización deficiente do proxecto, a contía das axudas reduciranse proporcionalmente respecto ao custo total do investimento, de acordo coas porcentaxes de financiamento sinaladas no parágrafo anterior.





SEXTA. Visita e publicidade das obras

As partes resérvanse o dereito a inspeccionar as obras derivadas do presente convenio durante a execución das mesmas.

Darase publicidade ás obras que se executen no marco do convenio mediante un cartel informativo da natureza das mesmas, con indicación expresa das Administracións Públicas que colaboran no financiamento das actuacións que comprenden. O tratamento tipográfico identificador das respectivas entidades e dos seus logotipos ou anagramas será idéntico.

Unha vez rematadas as obras deberase colocar unha placa nun lugar visible, na que queda constancia da data da inauguración e do financiamento concedido polas tres administracións públicas que concorren na sinatura deste convenio.

Aos actos de inauguración ou posta en marcha das instalacións asistirán os representantes oficiais designados polas entidades signatarias, para o que se facilitará, coa suficiente antelación, o día e hora de celebración dos mesmos.

En toda a información que se transmita aos medios de comunicación respecto deste convenio e das obras que conforme ao mesmo se leven a cabo, farase indicación expresa das Administracións Públicas que colaboran no financiamento das mesmas.

SÉTIMA. Xestión e mantemento das instalacións

Unha vez executadas as obras corresponderá á USC a xestión, mantemento e conservación das instalacións deportivas, correndo da súa conta a totalidade dos custos que en concepto de persoal, adquisicións de bens, servizos ao exterior e outros conceptos se deriven delas. A cuantificación global de tales custos segundo o último informe anual de contabilidade analítica ascendeu a 470.657,11 euros.

Da dita xestión, mantemento e conservación deixarase constancia na acta da recepción das obras que, para estes efectos, subscriban as autoridades asistentes ao acto indicado na cláusula anterior en representación de cada unha das partes asinantes do convenio, ou persoas en quen deleguen.





O anterior non exclúea a responsabilidade que á empresa adxudicataria lle corresponde na vixilancia e conservación das obras contratadas e ata a completa conclusión do período de garantía, unha vez rematados os traballos.

OITAVA. Forma de pagamento

Os pagamentos das axudas, en virtude da previsión contida no artigo 31.6 da Lei 9/2007, do 13 de xuño, de subvencións de Galicia xa citada, efectuarase nas contas titularidade da USC en que así se dispoña, en canto entidade beneficiaria, e terán o carácter de pagamentos a conta e fraccionados segundo o ritmo de execución das obras, aboándose pola contía equivalente á documentación xustificativa que se vaia presentando na medida da dita execución, nos termos recollidos na cláusula seguinte.

Estes pagamentos a conta non poderán exceder das anualidades previstas para cada un dos exercicios orzamentarios, por parte das administracións públicas que financian as obras.

Non obstante, de acordo co disposto no artigo 63 do Decreto 11/2009, polo que se aproba o regulamento da lei de subvencións de Galicia, prevese tamén a posibilidade de conceder pagamentos anticipados de ata un 80%¹ da subvencións previstas, naqueles supostos en que o investimento esixa pagamentos inmediatos e sen que se supere igualmente a anualidade prevista en cada exercicio orzamentario. A concesión do anticipo polas respectivas administracións autonómica e locais asinantes do presente convenio realizarase, de ser o caso, mediante resolución motivada.

En virtude do previsto no artigo 51 da Lei 3/2021, de 28 de xaneiro de orzamentos xerais da Comunidade Autónoma de Galicia para o ano 2021, a USC queda exonerada da constitución das garantías previstas pola normativa de subvencións para os supostos de pagamentos anticipados e á conta.

Con carácter previo aos pagamentos parciais que se vaian producindo e na medida en que a xustificación sexa correcta, por parte da USC emitirase ao mesmo tempo, ao abeiro do previsto no artigo 11 letra e) do reiterado Decreto 11/2009, a pertinente declaración responsable de estar ao día no cumprimento das súas obrigas tributarias, coa Seguridade Social e coa facenda da

¹ O Decreto 11/2009 establece o límite de pagamentos anticipados no 50% da subvención concedida, pero á vista da previsión contida no art. 63.4 podería incluso superarse a referida porcentaxe, tratándose de subvencións de capital instrumentadas mediante convenio con outras administracións públicas.





Administración Pública da Comunidade Autónoma de Galicia, así como non ser debedor por resolución de procedemento de reintegro.

NOVENA. Documentación xustificativa

Son gastos subvencionables os que cumpran cos requisitos fixados polo artigo 29 da Lei 9/2007, de 13 de xuño. Para estes efectos, considerarase gasto realizado o que foi efectivamente pagado con anterioridade á finalización do período de xustificación das axudas que rematará o día 30 de novembro de 2021 e 30 de novembro de 2022 para os gastos correspondentes ás anualidades 2021 e 2022, respectivamente.

De acordo co previsto no artigo 28 da mesma norma, a xustificación do cumprimento das condicións impostas e da consecución dos obxectivos, con carácter ordinario, terá lugar mediante a presentación de facturas e demais documentos de valor probatorio equivalente con validez no tráfico xurídico mercantil ou con eficacia administrativa, nos termos establecidos regulamentariamente. A acreditación dos gastos tamén poderá efectuarse mediante facturas electrónicas, sempre que cumpran os requisitos esixidos para a súa aceptación no ámbito tributario.

Para o cobro do primeiro prazo a Universidade remitirá certificación do acordo de adxudicación do contrato de obra.

Non obstante, en virtude da condición de Universidade da entidade beneficiaria das axudas, a xustificación tamén poderá consistir na certificación da intervención ou do órgano que teña atribuídas as facultades de control da toma de razón en contabilidade e do cumprimento da finalidade para a que foi concedida, sen prexuízo de que naquelas axudas e subvencións que se concedan con cargo a créditos financiados con recursos procedentes da Unión Europea, a xustificación dos gastos efectuarase con facturas ou documentos contables de valor probatorio equivalente, e a do pagamento, cos xustificantes das transferencias bancarias ou documentos acreditativos dos pagamentos realizados, de acordo coa normativa aplicable aos fondos europeos.

Xunto coa documentación sinalada no parágrafo anterior, achegaranse as certificacións de obra que correspondan.

A falta de presentación da xustificación no prazo establecido comportará o reintegro da subvención, ou da parte proporcional non xustificada, e demais responsabilidades establecidas, nas condicións previstas no artigo 33 e concordantes da Lei de subvencións de Galicia. na Lei de subvencións de Galicia.





O importe das axudas en ningún caso poderá ser de tal contía que, illadamente ou en concorrencia con subvencións, axudas, ingresos ou recursos para a mesma finalidade procedentes de calquera administración ou entes públicos ou privados, nacionais, da Unión Europea ou de organismos internacionais, supere o custo total da actividade.

DÉCIMA. Vixencia

O presente convenio entrará en vigor o día da súa sinatura e terá vixencia durante catro anos, sen prexuízo da posibilidade de prorrogar o dito período por un prazo máximo de catro anos subscribindo unha Addenda de renovación. Porén o financiamento das obras realizarase durante os anos 2021 e 2022 tal e como ven establecido na cláusula segunda deste convenio.

Porén, financiaranse os gastos relacionados coas obras programadas que se realicen desde o día 1 de marzo do presente exercicio 2021, sempre e cando amparen actuacións encamiñadas a asegurar o correcto cumprimento dos acordos acadados. En todo caso os pagamentos dos gastos subvencionables ao abeiro deste convenio deberán estar efectivamente realizados na data límite de presentación da xustificación establecida na cláusula precedente.

A denuncia, que requirirá o acordo previo do órgano competente da administración que a pretenda, producirá efectos aos noventa (90) días da súa presentación diante da comisión á que se refire a cláusula décimo terceira, logo da liquidación das obrigas pendentes de cumprir pola parte que a formule.

O incumprimento das cláusulas deste convenio será causa bastante para a súa denuncia.

De acordo co artigo 51 da Lei 40/2015, do 1 de outubro, de Réxime Xurídico do Sector Público, son causas de resolución do presente convenio:

- 1.- O transcurso do prazo de vixencia do convenio sen que se teña acordado a prórroga do mesmo.
- 2.- O acordo unánime de todos os asinantes.
- 3.- O incumprimento das obrigas e compromisos asumidos por parte de algún dos asinantes. Neste caso, estarase ao disposto no artigo 51 c) da Lei 40/2015, do 1 de outubro, de Réxime Xurídico do Sector Público.
- 4.- Por decisión xudicial declaratoria da nulidade do convenio.





5.- Por calquera outra causa distinta das anteriores prevista no convenio ou noutras leis.

DÉCIMA PRIMEIRA. Modificación do convenio

As causas polas que se pode modificar o presente convenio son:

1.- Por acordo unánime dos asinantes.

En todo caso, a solicitude de modificación do prazo para presentar a xustificación do convenio, por parte da Universidade, deberá realizarse cunha antelación mínima dun mes á data de finalización do mesmo.

2.- De acordo co artigo 31.4 da Lei 14/2013, do 26 de decembro, de racionalización do sector público autonómico, cando teña como finalidade o logro dos obxectivos de estabilidade e sustentabilidade financeira.

Esta modificación respectará en todo caso o obxecto da subvención, evitando actuacións deficientes e incompletas.

DÉCIMO SEGUNDA. Comisión de seguimento.

Para o seguimento e coordinación das accións previstas no presente convenio crearase unha Comisión mixta e paritaria integrada por un representante de cada unha das entidades públicas que subscriben o presente convenio.

A Comisión mixta poderá ditar as súas propias normas de funcionamento, debéndose reunir cando así o solicite algunha das partes. Entre as súas funcións destácanse:

- A interpretación do convenio.
- A intervención previa á resolución por incumprimento polas causas previstas normativamente.
- Proposta, de ser o caso, de addendas.
- Resolver cantas dúbidas se lle presenten polos membros integrantes.
- Calquera outra relacionada co desenvolvemento deste convenio.

Como órgano colexiado a comisión someterase ao réxime establecido na mencionada Lei 40/2015, de 1 de outubro, de réxime xurídico do sector público





e na Lei 16/2010, do 17 de decembro, de organización e funcionamento da administración xeral e do sector público autonómico de Galicia

Non obstante, todas aquelas cuestións que se susciten en relación co outorgamento, cumprimento, xustificación e pagamento, así como o reintegro e posibles responsabilidades relacionadas coas subvencións concedidas, resolveranse pola respectiva administración pública que tramite as axudas.

DÉCIMO TERCEIRA. Obrigas de publicidade

O presente convenio será obxecto de publicidade e inscrición de conformidade co disposto no Decreto 126/2006, do 20 de xullo, polo que se regula o rexistro de convenios da Xunta de Galicia. Así mesmo, será obxecto de publicación e inscrición en cumprimento do disposto no artigo 17 da Lei 1/2016, do 18 de xaneiro, de transparencia e bo goberno e no artigo 15 da Lei 9/2007 de subvencións de Galicia, e no Decreto 132/2006, do 27 de xullo, polo que se regulan os rexistros públicos creados nos artigos 44 e 45 da Lei 7/2005, do 29 de decembro, de orzamentos xerais da Comunidade Autónoma de Galicia para o ano 2006.

As partes asinantes manifestan o seu consentimento para que os datos persoais que constan neste convenio, así como o resto das especificacións contidas no mesmo, poidan ser publicados no Portal da Transparencia e Goberno Aberto.

En cumprimento do disposto nos artigos 18 e 20.8 da Lei 38/2003, do 17 de novembro, xeral de subvencións, comunicarase a subscripción deste convenio á Base de Datos Nacional de Subvencións, que opera como sistema nacional de publicidade de subvencións.

DÉCIMO CUARTA. Información básica sobre protección de datos persoais.

As partes asinantes deste convenio garantirán a confidencialidade dos datos persoais aos que teñan acceso como consecuencia das actuacións realizadas en execución deste, consonte o disposto na Lei orgánica 3/2018, de 5 de decembro, de protección de datos persoais e garantía dos dereitos dixitais e no Regulamento (UE) 2016/679 do Parlamento Europeo e do Consello, do 27 de abril de 2016, relativo á protección das persoas físicas no que respecta ao tratamento de datos persoais e á libre circulación destes datos.





Os datos persoais recadados neste procedemento serán tratados, en canto ao réxime das subvencións, por cada unha das administracións públicas responsables do tratamento e coa finalidade de levar a cabo a tramitación administrativa que se derive da xestión deste convenio. O tratamento dos datos baséase no cumprimento dunha misión de interese público ou no exercicio de poderes públicos.

As persoas interesadas poderán acceder, rectificar e suprimir os seus datos, así como exercitar outros dereitos comprendidos na normativa citada anteriormente, a través das sedes electrónicas respectivas ou ben de xeito presencial nos lugares e rexistros establecidos na normativa reguladora do procedemento administrativo común.

DÉCIMO QUINTA. Réxime xurídico

O réxime xurídico deste convenio vén determinado polo establecido no mesmo, na Lei 9/2007, do 13 de xuño, de subvencións de Galicia e na Lei 38/2003, do 17 de novembro, xeral de subvencións; o Decreto 11/2009, do 8 de xaneiro, polo que se aproba o regulamento que desenvolve a devandita Lei 9/2007, e demais normativa que sexa de aplicación.

Este convenio é de natureza administrativa e, consecuentemente, as cuestións litixiosas que xurdan na súa aplicación, interpretación e cumprimento serán competencia da xurisdición contencioso-administrativa.

E en proba de conformidade coas estipulacións do presente convenio, asínano a totalidade dos comparecentes, por cuadruplicado exemplar, no lugar e data ó comezo indicados.

O Secretario Xeral para o Deporte

**O Presidente da Deputación Provincial
da Coruña**

José Ramón Lete Lasa

Valentín González Formoso

**O Alcalde do Concello de Santiago
de Compostela**

**O Reitor da Universidade de Santiago
de Compostela**

Xosé Antonio Sánchez Bugallo

Antonio López Díaz

